


魏貞菴先生年譜







魏貞菴先生年譜

魏荔彤輯

編主五雲王

編初成集書叢

譜年生先菴貞魏

中華民國二十六年六月初版

編輯者

魏

荔

彤

發行人

王

上海河南路

雲

五

印刷所

商

上海河南路

務

印書館

發行所

商

上海及各埠

務

印書館

魏貞菴先生年譜

清 魏荔彤編輯

謹按公諱裔介。字石生。號貞菴。一號崑林。本出姬姓。發源畢公。衍於文侯。豪於信陵。代有聞人。然譜牒失傳。莫可稽考。其可考者。元末有祖諱寒臘。居柏鄉城西南之聖德村。永樂年。有孝廉諱進。數傳至壽。以明經爲山東汶上縣訓導。學有淵源。及門受業者。皆爲名士。壽生嚴。號澄齋。在曩序有聲。以仲子謙吉任少司馬。受封都察院僉都御史。巖生謙光。號慎齋。以明經爲湖廣衡山縣知縣。有善政。早歲懸車。貞菴公之高祖也。慎齋公生大成。字時夫。號樂吾。高才博學。操持嚴正。以理學著稱。以子貴封文林郎。永城知縣。其後以貞菴公貴。贈都察院左都御史。晉贈內祕書院大學士。加一級。大成生純粹。字乾仲。萬歷甲午舉於鄉。甲辰第進士。任河南陽武知縣。調永城。四舉循良。皆居第一。行取考授山西道監察御史。正色立朝。侃直蜚聲。其後以孫貴。贈都察院左都御史。晉贈內祕書院大學士。加一級。純粹生柏祥。字元昌。號拙菴。貞菴公之父也。學識奇偉。諸子百家之書。無所不讀。通達時務。詩文卓絕。天啓辛酉。選貢。考中縣令。未仕。以子貴。贈吏科右給事中。贈都察院左都御史。晉贈內祕書院大學士。加一級。生子五人。貞菴公其次也。

丙辰。明萬歷四十四年。公以秋七月建丙申二十五日癸巳辛酉時。生於柏鄉。在城社南門西路東之宅。

魏貞菴先生年譜

父拙菴公年二十四。母張太夫人年二十二也。

丁巳公二歲。

戊午公三歲。

己未公四歲。

庚申公五歲。

弟裔訥生。

辛酉公六歲。

拙菴公以是冬恩選入國學。

壬戌公七歲。

初入家塾。

癸亥公八歲。

從師張從野讀書。師甚奇之。

甲子公九歲。

乙丑公十歲。

從師郭懷遜讀經史於樸園。拙菴公別業也。

丙寅公十一歲。

應童子試。

丁卯公十二歲。

拙菴公應順天鄉試。旋祖母程夫人以疾捐館。公哀戚若成人。是歲弟懋生。

戊辰公十三歲。

春葬祖母程夫人。

己巳公十四歲。

從唐山徐構奇讀書。每課文。拙菴公佳之。

庚午公十五歲。

春院試。文宗霍諱鏌。取中第五名入學。

辛未公十六歲。

從臨清陳孔昭師講易、讀史記、國策、三蘇文、看通鑑。

壬申公十七歲。

弟裔訥入學。

癸酉公十八歲。

公讀書樸園。應順天鄉試不中。時流寇甚熾。將犯柏邑。縣缺印官。大名司李張公緒繪馳至南門。拙菴公率公叩馬留之。謂其出則必陷。張公悟。乃登陴。拙菴公率衆守城。公爲之佐。卒以全城。

甲戌公十九歲。

與石含醇諱粹者。讀書於樸園。

乙亥公二十歲。

與唐山趙問源諱漁者。讀書樸園。看四書大全。錄其要者。

丙子公二十一歲。

春入西山桃源洞讀書。每靜坐巖岫中。觀心體澄然處。空山無人。水流花開。大有會悟。秋應順天鄉試。以謄有訛字弗售。

丁丑公二十二歲。

讀書樸園。拙菴公謁選京師。寄書有珍重窗前第二枝之句。冬歲考。吳文宗諱道昌。深加賞識。取第一名補廩。

戊寅公二十三歲。

春真定太守范成六公。選三十二城士入恆陽書院讀書。公居第一。與梁邇之、梁玉立、杜子靜、諸公。迭爲恆郡首卷。范成六師甚奇之。曰天下士也。

己卯公二十四歲。

在真定。寓木塔寺。與陳道隆、梁昭性、王安之會課。爲課長。是歲娶內邱別駕韓公之女。賢而勤儉。每日紡績佐讀。爲成六范公。選恆陽大社文刻之。

庚辰公二十五歲。

仍寓真定。手批真西山文章。正宗陶淵明集暨國朝憲章類編。弟訥有疫疾。公回里。晝夜醫視得無恙。是歲大旱。人相食。公題詩誌感。蓋早有濟世之志。冬有事京師。至家而疫作。七日不食。拙菴公及母張太夫人甚憂之。妻韓氏晝夜省侍。治湯粥。扶起臥。旣而得愈。歲試弗預。弟訥居第一。

辛巳公二十六歲。

至京補考。吳元汭宗師深加嘆賞。仍准前列。錄科第一名。

壬午公二十七歲。

舊真定太守范成六。由關內道陞巡撫山西。請公赴太原署。以禮幣先。遂赴之。由獲鹿至平定州。適成六公到任八日。推陞薊密總督。成六公仍命隨行。至定興復轉關外總督。又命公行。公懇辭以家有老親。且勉范公以身報國。遂別而歸。讀書於城南柳莊。秋順天鄉試中式。主考爲江西豐城羅小遜。山東濟寧楊梟岫。房考王諱大捷。字仙掌。湖廣武陵人。

癸未公二十八歲。

是時天下之事已危。公公車至都。具二疏。其一言召募之兵不可用。宜清理衛所。選將練卒。其一言民困已極。四方有瓦解之患。宜大蠲其積逋。以收拾人心。庶幾可以挽回。太常慧公見而稱之曰。王佐才也。但策雖善。恐時不能用。不如藏器以待時。遂止。時因都城戒嚴。改會試期。公乃馳回家省親。復讀書於柳莊。七月北上。時京師大疫。病死者數十萬人。八月中秋夜雨。西山已變爲雪。其氣節之失正如此。歸而捷報不至。復讀書來雉園。時傳流寇已陷關中。盡取陝西之地。

甲申公二十九歲

春流寇僞檄至晉。晉中擾亂。公適有炊臼之變。瓶中無米。嚮衣以爨。五月大清定鼎。催舉人赴選。遂至都。上疏願會試不願卽仕。部覆允之。是秋公弟侗生。冬月娶袁氏。高邑庠生袁燧女。

乙酉公三十歲

下帷樸園。寧昌高柱河侍御。有江南督學之役。具書幣來邀。辭弗往。公姊夫光猷。柱河之子也。復來固請。遂促裝東行。路出臨清。博平。鄒。滕。濟寧。徐州。宿遷。淮安。揚州。鳳陽。滁州。和州。攬其山川人文。及志書古蹟。風土人物。有南遊紀略之篇。是秋公兄竟甫中副榜。恩貢生。冬日北歸。

丙戌公三十一歲

會試公中第十二名。房考杜月湖先生。長垣人也。批曰。英分超絕。深於雅。合於度。蓋賈董之學。而副之。以蘇長公之筆。是必後日有大用者。殿試三甲。前列狀元。爲聊城傅以漸。考詞林取中第二十名。奉旨

入館教習讀書。試多高等。是年上賜名畫十餘軸。有宋徽宗鷹。關九思竹等。

丁亥公三十二歲。

迎公母張太夫人至京。是秋散館。授工科給事中。慷慨言天下事。諸仕宦者聞公素直。或誘之以門戶。或怵之以朋黨。公不顧曰。大丈夫盡忠朝廷耳。何依傍爲。於是有添設道員宜裁一疏。直糾邪臣。首舉計典二疏。皆奉溫綸。

戊子公三十三歲。

仍在工科。有聖德與年俱進。仰乞及時講學。以隆萬世治本疏。時世祖皇帝尙未親政。學士陳之遴。典籍王鍾龐。相遇於午門外。看公揭帖。曰。老掌科。端本之論也。時部務壅滯。常數月不行。公上疏陳註銷。摘參之規。旨趣之時。直隸錢糧。濶冒。具有蠲荒。屢奉恩旨。畿輔未沾實惠。一疏。下部行之。秋科。臣例與典鄉試。是歲新定考例。公與科臣姚若侯。部屬梁邇之。諸人同考。公居第一。典試山西。取舉人程正緒等八十人。便路至里省親。十一月復抵都下。

己丑公三十四歲。

大同總兵姜瓖叛。公有請召對之疏。攝政王從之。卽日召對。公首陳寬逃人之法。卽奉俞旨。仍賜同時諫言者禮科給事中梁維。本人二百金。人心大悅。公循例轉吏部右給事中。二月。公母張太夫人訃至。公一慟幾絕。語孺人袁氏曰。余爲官所羈。不得不待命。爾婦人宜速奔喪。袁孺人遂先歸。公候命至四。

月。兵部孝字勘合仍未得。公痛哭曰。母亡尙待勘合耶。卽刻乘一騾。隨二僕。疾馳四日。行八百二十里。外步哭至正寢。哀動行路。公父勉慰。令勿過痛滅性。而公形已骨立。袁孺人歸。亦臥牀不起。蓋孺人性至孝。因哭姑成勞也。九月二十一日。拙菴公以痰症終。公更哀慘。大病越數日。袁孺人亦逝。公神情怯弱。不能臨視。望之哀號數聲。卽令人扶回父母柩側。嘗語人曰。吾不幸而死。未襄父母大事。乃罪人也。若手口拮据。卒瘞安厝。大事而死。死亦足矣。五月生一子。殤。公旣病甚。恐旦夕不保。公四弟慤。婦趙孺人懷妊。遂與兄弟謀曰。若男也。以爲繼。十一月果生男。遂以爲子。卽勤也。

庚寅公三十五歲。

相地於邑東西山水之間。至臨城盤石村。低水南環。平岡東峙。徘徊其地者久之。欲卜葬公父母。以他故未果。

辛卯公三十六歲。

三月仍葬拙菴公及張太夫人於祖塋之舊阡。又逾月葬袁孺人於郭西白園之新阡。捐資刻拙菴公所選李杜王蘇四家詩。公詳爲考訂。冬十二月服闋。

壬辰公三十七歲。

春正至都。銓宰欲公一至其門。公不可。五月乃補吏科右給事中。因逃人法峻。上察戒宜責州縣一疏。時朝儀未肅。上請舉視朝之大典。以致泰交之盛治一疏。是月世祖皇帝臨朝。因定朝規。時直隸河南。

山東水災。上災民望救甚急。蠲賑實出特恩一疏。時有上傳訪明季京城殉難諸臣。上褒錄幽忠。實聖朝之曠典。謹舉平日所聞一疏。內列大學士范景文等二十九人。奉旨著禮部詳訪確察具奏。皆從褒揚之典。太僕寺丞申佳允未蒙旌錄。公復上一疏。卒一例贈祭諡。祀於鄉。是年秋武會試公分房。冬十二月舉一女。

癸巳公三十八歲。

二月內轉工科左給事中。有上諭令言官直諫無隱。公言自昨歲以前。北水南旱。九月內星變迭作。入冬以後。太白退舍。瑞雪三降。天意人心。如桴鼓響應。皇上旣側席虛己。有置鼓立木之求。臣安敢緘口。辜恩違懷。仁負義之戒。謹條四款。一崇節儉。一勤聖學。一度兵勢。一省刑獄。疏略云。皇上以身先天下。蘇杭織造宜減去其半。金銀器玩不必造。珠玉錦繡。士民不許濫用。一勤聖學。欲皇上於政事之暇。講求朱熹通鑑綱目。真德秀大學衍義。邱濬大學衍義補。唐太宗貞觀政要。先於設施。以致太平。一度兵勢。川湖用兵。連年不已。欲皇上折衝樽俎。敕下行間。將帥量力而行。兵足以取糧。足以守。則速取之。兵雖足取而糧不足守。則姑且置之。令督撫大帥儲糧飭備。俟吾輓輸不匱。一舉而滇蜀可定。一省刑獄。謂舊例有罪法當死者。三覆五奏。毋輒行刑。今在外者。尚循監候再審之例。而在內者。未見舉行。乞皇上敕下刑部詳查舊例。卽賜施行。疏入。奉有俞旨。仍敕部覆。皆允行之。四月天旱。上令言官各抒所見。凡大利大害。應興應革者。悉心條上。公上疏陳二事。一言封疆未靖。一言河工未竣。二者天下之大利。

大害。奉有俞旨。部覆行之。時直隸州縣錢糧。各自赴郡銷算。使費煩勞。公上疏言。各省銷算。既歸於各布政。直隸銷算。自宜歸之各府。事屬便民。奉旨。令部覆允行。時有司貪婪。撫按糾參者。往往卸罪。衙役希圖復用。公上疏論其弊。奉旨允行。是夏。刻拙菴公所著史鑿。時士習浮靡。不尙實學。公上疏請端風尙。崇古學。以養一代之人才。一請以孝經命題。一請舉劾教職。一請禁止坊刻。一請修葺學宮。一請查訪節孝。奉旨。都著詳議具奏。時京堂陞轉不均。公上疏請定原官遷轉之規。以佐內外並重之法。部覆允之。九月。膠州總兵海時行。因兵變叛。而三省總督馬光輝。漕運總督王文奎。邀擊之。時行自縛乞降。公上疏以爲時行受國家大恩。使兵未交刃。棄甲來歸。罪猶可恕。今兩次拒敵。敗挫狼狽。計無所出。始殺陳謨等。以就撫。宜明正其罪。以伸國法。並糾山東撫臣夏玉縱寇殃民之罪。兼請釋放被搶民間婦女。奉有俞旨。部覆允行。遂斬時行。時武科淹滯。公上疏請疏通選法。文武一視。時連歲水旱災傷。上諭痛念兵民凍餓。欲拯救其疾苦。公上疏陳八款。一發倉粟。一安流民。一豁丁徭。一核兵餉。一散糧餉。一請蠲免。一賑貧困。一恤耕牛。部覆多見允行。世祖遂刻戒殺彘鈔一書。頒行天下。勸戒臣民勿殺牛食牛。溥聖明及物之仁。蓋於此見君臣之一德也。是冬。公讀易性理大全。及二程諸儒等書。有所得。則錄之。書成名曰約言錄。分爲內外二篇。其內篇多言性命之理。其外篇多言經濟之略。黃岡曹木欣先生容城徵君孫鍾元先生序之曰。古稱燕趙節氣之地。而實聖學淵源之區也。董廣川開天人之宗。邵范陽合理數之蘊。迨劉靜修大其堂構。而鹿江村嗣其徽音。文未喪天。道豈墮地。不絕如綫之一脈。當與

世而常存。邇讀石生先生約言錄。殆踵董邵劉鹿而繼起者。與曹子厚菴序之曰。其道由窮理以及力行。其教由周程以及許薛。其言由性命以及功化。斯於聖學也。亦可謂明且正矣。讀其書。誠如其言。而愚更有心折者。楊朱學於老聃。卽道家者流。墨氏亦當時之賢。與孔子並稱。未嘗無父也。無君也。孟子謂其著書之流弊。必至於無父無君。故昌言闢之。至比於禽獸。以視今之禪。公然棄君臣父子夫婦朋友者。何如哉。其禍之烈。入人於骨髓。心術之微。百倍於楊墨。而世莫敢與之抗。先生剛果勁直。毫無回護。孟子而在。其急引爲知己也。豈待問耶。道喪學荒。非有深心定力。不搖於中。則撼於外。故奏績最難。先生氣魄大。其展局自宏。精力專。其合道更捷。學有本原。而事無棘手。曲士拘攣之習。腐儒帖括之案。一洗而盡除之。所謂以拔本塞源之力。奏掃蕩廓清之功者也。聞之先儒云。商周之際。道在箕子。箕子陳疇。疇乃治天下之大法也。宋元之際。道在許子。許子興學。學乃治天下之統功也。清明之際。天固慎簡一人焉。付之以斯文。而寄之以道系。先生夙昔自命。斷不敢落二子後。而當世之所仰望先生者。亦且有同心矣。逢幼而有志。蓋無所聞於先生。有知己之感。日誦內外篇。而手評之。復不禁中心之嚮往也。徵君乃海內第一流人。其推尊之也如此。又寄公以蘇門圖。擬公以當今姚許。高山流水。託於鍾子期之知音焉。時又有兵部尙書中州李際期。稱其振大道之要領。攻後學之膏肓。莊誦一過。便覺氣質爲之一變。公又讀薛文清讀書錄。摘其要者刻之。曰讀書錄纂要。蓋自是海內言理學者。咸推尊公。公則未嘗以是標榜。嘗誦述邵二泉先生語曰。甯爲眞丈夫。勿爲假道學。是歲吏部題爲欽奉恩詔事。公

父拙菴公贈徵仕郎吏部右給事中母張氏妻韓氏繼妻袁氏並贈孺人。

甲午公三十九歲

時連歲大水民多流移公惻然傷之乃上疏題爲流民死傷堪憫乞聖恩大發賑濟事疏入上爲大感動奉聖旨饑荒流徙民不聊生朕深切憫念這本沿途賑濟隨地安插並勸懲鼓舞事宜俱屬急務著速詳議具奏該部知道遂發銀二十四萬兩差吏部尙書王永吉等分往各府賑濟饑民全活者甚衆蓋曠典也公又於里中令家人煮粥以濟流民所全活數千人六月陞兵科都給事中公上疏直糾庸懦大帥續順公沈永忠有旨令沈永忠自行回奏其後革去公爵戴罪立功時將舉行軍政考察天下武職官員公上續陳軍政事宜疏部覆行之是歲軍政肅然時停止巡方御史而督撫不行舉劾衙役盡惡無所懲戒公上請定督撫舉劾之例一疏凡督撫到任後滿一年者舉劾文武一次銜盡一年嚴拏一次奉旨俱如公議行時詔舉山林隱逸公上疏言圖治首重用人恩詔務期實遵旨隨之各省於是多有舉者

乙未公四十歲

值會試公上南北分卷宜公人才庶無淹滯疏自是南北中卷以人數多寡定取額時四川雲貴湖南廣西瀕海俱未底定公上疏敬陳用兵大勢仰乞先定廟算明賞罰以圖天下之太平公又上六疏一曰破資格以用言官一曰定會計以清財賦一曰興教化以正風俗一曰重農功以資兵力一曰講律

令以清刑罰。一曰竣大工以恤民生。時有山賊高三。自山西之五臺、繁峙、孟縣、樂平、真定之平山、阜平、贊皇等處，往往被其蹂躪。公上疏請令直隸山西合勦，務在必獲。其後直隸山西合勦，賊計窮始降。兩地人民俱有安枕之日矣。時福建提督楊名高怯弱無能，失陷漳州。公上疏糾之，名高遂被處。公之在兵垣也，於天下兵機之事，尤爲留心。凡戰守攻取賞罰，知無不言。上於是有大用公之意。上在太和門左東室，與諸王坐，令大學士圖海傳諭引見。俾諸王皆知之。又於五鳳樓內數召見，面詢其庚甲。時在廷皆知上之注意於公也。是歲武會試，公又以兵科蒙欽點分房。事竣有旨，令公內陞。吏部補公太常寺少卿，提督四譯館。未幾，副都御史缺，上遽陞公爲都察院左副都御史。公語人曰：「本意託迹清卿，讀書數載，以備顧問，乃蒙聖恩超擢如此，其何以報。」上又令學士麻勒吉宣公至中和殿，諭以此番擢用出朕之意，非有他人薦舉，不可聽人引誘，須力破黨羽之習，以副眷注。公稽首謝。時銓法壅滯，公上疏陳六款：一去生員之教習，一嚴教職之舉劾，一裁抑州縣吏員不許考佐貳，以選貢生爲之一重通判之職，一作州縣陞缺，一鴻臚卿留作京堂陞轉，一佐貳官員缺，按季報部院，上嘉納之。十二月，上賜公御筆畫一幅，又賜馬一匹。是年三月，子嘉孚生。

丙申公四十一歲

上駐南苑閱武，召廷臣賜宴行宮，各賦詩應制。詩曰：海甸春風滿，昆明瑞氣開。六師貔虎動，八陣軒轅來。魚藻歌周讌，金莖賜漢杯。修文兼耀武，天眷懋隆哉。夏月，同高念東、梁葵石、楊崑嶽、瀛臺啓事、聽太

液池流水聲。賦一絕句云。千頃琉璃太液圖。幾行鳧鴈唼菰蒲。石橋一枕聞流水。夢入扁舟舊五湖。蓋公之心澹然於富貴。故在廊廟之間而瀟灑如此也。時上御製之書。有戒殺彙鈔。人臣儆心錄。資政要覽。順治大訓。勸善要言。範行恆言。孝經衍義等書。公上疏請頒賜天下。以善世化俗。蓋公之以仁義事君如此。時海內漸平。風雅騰起。公與鉅鹿楊猶龍。永年申臯盟。內邱喬文衣。太倉吳梅村。合肥龔芝麓。唱和四方。詩人多酬答之。公於是。有觀始集之選。時雲南土司不肯投順。而沿海造船。所費不貲。公上疏言。洞蠻所以不歸者。以朝廷欲追其前朝敕命。但期歸順。給以新命。不必追之太蚤。沿海一帶。船必不能下海。不若遽守險要。使其片板不得到岸。久之自困。後卒用公之策。沿海得安。寇不復入犯矣。

丁酉公四十二歲

正月上諭。撤大學士成克鞏。回內閣。廷推公堪任總憲。遂蒙點用。公受上之知。思圖獻納。乃上修憲綱。以明職掌疏。上命酌議具奏。公因日食。陳言上實圖修省。以祈天祐疏。末云。願皇上深思遠慮。救之於未變之前。修德修刑。持之於既變之後。念海宇之初平。則以寬大爲務。恐驕盈之易至。則以節儉爲先。民力將竭。用一緩二。疆場靡寧。招攜懷遠。云云。奉旨。這奏內事關朕躬的。知道了。餘著詳確議奏。內外大小臣工。務各洗心盡職。實圖修省。部議皆允行之。時國用不足。公以爲宜行屯田。乃上疏敬陳軍屯大政。以定足國阜民之善制。事下部議未行。是歲覃恩。贈公會祖樂吾祖父乾仲父拙菴三代如公官。曾祖母馮氏。趙氏。祖母張氏。程氏。母張氏。並爲一品夫人。

戊戌公四十三歲

時撫按沿明季舊習。薦語事浮詞。貪酷官員。部文到日。方行提問。公上疏以爲薦舉宜有實政。貪酷難以姑容。部議行之。經筵侍講。講漢文帝春和之詔一條。公又上時際春和。請法天道以行仁政疏。一曰恤禁。獨一曰掩骼。一曰課農桑。一曰舉孝行。俱下部議行之。時民間困弊。衛所沿襲舊例。躲避差徭。逋欠糧賦。公以爲欲足民必先清衛。於是上疏言興利除弊之大。莫若裁併衛所。丁田歸之州縣。以足財用。以蘇民生。部議如公所請。是年夏。上命作楞嚴會解序。公具稿進呈。大意歸重於三皇五帝之治天下。神而化之。使下各復其性。仲尼刪詩書。正禮樂。教天下萬世之人。而孟軻氏復闡明性善之理。以拒當世之淫詞邪說。皇上仁覆萬物。以是爲化導助。故亦使天下之人。同歸於本性之至善而已。蓋公之學。以性善爲宗。於此露其大端矣。上覽而嘉之。刻列經首。時海內文教日盛。崇尚風雅。公於是有唐詩清覽集之選。秋。上獵於南海子。命公從。賜食於黃幄中。詢及民間收穫。公對以小民艱難。所收僅足供糧。上又言古之人君。唐太宗真□英主。又論及在廷羣臣賢否。是時同在黃幄中者。李蔚、梁清標、王熙、曹本榮也。是日上賜公所乘馬。燒獐兔割而啖之。次日。世祖命諸臣作詩以咏。公應制詩云。凌晨謁黃幄。煙中雨露微。過橋平野闊。吹角絳旗威。雲破饑鷹出。草鳴鐵騎歸。天顏思喜起。作賦近光輝。他日。公又從獵。見黃羊蹶起。世祖指示之曰。口外之獸。此最善走也。公有絕句紀之云。玉靶雕弓斜控鞍。箭如鴟叫萬人歡。儒臣後騎承恩寵。指點黃羊親與看。蓋君臣之浹洽如此。時科臣王命岳上疏請查

河南山東兩省荒地。著九卿會議允行。差御史往察。上命都察院保奏。公保御史李森先、李騰龍、再保陳棐。又上察荒業有成命。察法尤宜簡易。疏凡七款。一分步弓之分寸。一減隨察之官員。一清飛詭之積弊。一減儀從之繁文。一禁造冊之加派。一寬開墾之新地。一定察荒之限期。部覆議具奏。旨允行。仍令公定期限。僅定五月報命。御史登堂稟曰。二省道路遙遠。察荒必須親到。老堂翁定限止五月。如何能了其事。公應之曰。御史若逐府逐州逐縣。親身丈量地畝。卽十年亦不能完。若令各府各州各縣自爲丈量。而御史總其成。卽兩月可畢其局。五月之限。不爲不多矣。御史乃豁然大悟。是時河南山東之人。深恐查報煩擾。而公行所無事。蓋公之誠見。如在高處立。無遠不見。人始服其爲民之切也。時有流寇餘黨孫可望。自湖廣歸順。封以義王。伊具疏向上借銀。又爲其弟討勸合。公上直糾陳請之。非以正悖謬之罪。疏言可望悖禮背義。越分干名。疏上可望大懼。世祖皇帝大悅。差學士麻勒吉召公至內院。官旨云。爾上疏之言。最是如此。乃不負職掌。但以其遠人未歸。故寬之耳。可望自此膽落。諸事收斂矣。

己亥公四十四歲

二月雲貴平。公同大學士馮銓啓奏於乾清門。世祖謂馮公與公曰。雲貴蕩平。朕喜兵戈自此偃息也。公於是有滇黔已歸聖化。朝廷撫恤必周一疏。內言蠶叢魚鳧之區。金齒繡面之地。咸角崩而恐後。並稽首以來王。誠所謂兵不血刃。有征無戰者也。但李定國逃遁永昌。其勢已迫。若果悔罪來歸。不妨許以封侯之爵。儻怙惡不悛。便當窮兵追討。井底遊魂。其何能久。若夫捐無名賦稅。以慰新附之民。薦地

正月春公陪祀南郊。祈穀陪祀。有咏云。農務肇嘉禮。鸞輿出鳳棲。威儀肅漢典。甲仗控吳鉤。暖氣回春律。精誠備庶羞。豐年欣有咏。端拱可垂旒。陪祀方澤。有咏云。方澤近城陰。春來爽氣侵。鐘聲雲外轉。柳色雪中沈。侍衛□華輦。星燈照夜林。馨香惟主德。作頌繼元音。世祖皇帝因亢旱。下罪己之詔。令羣臣自陳。公痛陳己罪。力求罷斥。奉旨革去公太子太保。並加一級。公愈加小心。自思補過而已。於是。有嚴禁巡風御史。交通各官。以肅風紀一疏。有糾參不職御史一疏。有特參南贛撫臣玩寇殃民一疏。有裁革巡風衙門承差及納銀吏一疏。有嚴禁外官宴會饋遺一疏。有請行糾拾之典。以補甄別所未及一疏。公又有酌議應行事例。以肅臺政一疏。又有再陳應行事宜。以肅臺政一疏。又有指陳畿輔盜賊充斥之根源。總由滿洲莊屯防範之疏。縱一疏。又有請設漢官僉都御史一疏。又有海寇有可滅之機。敬陳攻剿之良策。密疏其疏。俱載奏疏集內。又有捐助之來歷。未明大臣之廉恥。宜勵一疏。又有遵諭據實條奏一疏。又有人才之教諭。宜蚤旗下之科目。應復一疏。又有詳陳救荒之政一疏。又有請行發憑之例。省有司之費。除貪黷之根。以清吏治。以安民生一疏。其疏大意。以民生之困。皆由於有司之貪。有司之貪。亦非有司之罪也。謁選京師。近者已費數十金。遠者二三百金。遲者守候二三年。速者一年半。年。投供。畫憑。賃房屋。覓長班。見官長。赴宴會。其費不貲。未任揭取京債。到任必須償還。是以有司雖欲清廉。而不能。莫如行發憑之例。拔本塞源。改絃易轍。天下民生幸甚。此疏關係吏治民生甚大。事下部覆。初議行之甚便。於有司。又有欲求治安良策。必先立國之大本。以求泰交之實政。疏內言天下未平。

皆由徵求太急。刑罰太繁。以致良法美意。不能膏潤於窮簷。今當獎進直言。激發唯諾。有唐虞喜起之風。無上下否塞之象。共尙寬大平易之術。勿爲刻薄瑣屑之計。期於風俗仁厚。刑獄止息。風雨調和。順天道而合人情。等語。奏上旨云。刑罰太繁。所指何事。公回奏以聞。是夏刻小學集註完時。天旱已久。雨澤不降。多方祈禱不應。大學士某懷奸結黨。傾害善類。上心惡之。屢加訓飭不悛。舉朝怨憤。知不敢言。公曰。吾受上知最深。頗可畏避而不言哉。遂上政本之地宜清。邪臣之惡已極。據實糾參一疏。世祖皇帝覽疏震怒。敕諸王大臣九卿科道會審。旨下甘霖大沛。又以公居憲職。不蚤糾參。革職送刑部擬罪。公與某對質。某人詞屈。諸王九卿科道咸直公。覆疏抵某人罪。復公官爵如故。世祖皇帝面加覆核。賜公食。公退居私寓。研究經學。刻所輯四書大全纂要。方事之未結也。公勢孤寡。援人咸危之。而公伏案讀書。未嘗有鬱抑之色。但曰。聖明在上。豈有不自之理。卽罷斥歸田。吾從黃綺而沒齒矣。復何憂哉。

辛丑公四十六歲

公在私寓候補。世祖皇帝崩時。正月初八日也。公入哭。大慟。服斬衰。朝夕擗踊。灑淚。作輓。大行皇帝詩八首。未幾公奉旨仍掌都察院事。上初卽位。未親政事。皆決於四輔臣。八月公自陳不職。求去。奉旨慰留。十一月蒙上賜元狐帽。貂鼠朝衣。是時以財用不足。加派天下地畝錢糧五百餘萬。公上疏請合計天下之兵食。停止加派。以培國本。以恤民力。疏入。隨奉上諭停止。人心大悅。一時學士大夫爲詩歌以贊頌之。

壬寅公四十七歲

時聖祖母太皇太后猶稱皇太后。聖母皇太后猶稱皇貴妃。人莫有言。公與同官甯古理言曰。焉有皇上卽位。踰年改元。已久而不加尊稱者。遂上疏請加聖祖母太皇太后。聖母皇太后之尊稱。奉旨會議舉行。六月內有通行結事之限。以勵明作之政。一疏有罷雲南之大兵。以省財賦。慎荆襄之要害。以杜亂萌。疏內云。荆襄爲天下腹心。宜擇一大將。領精兵數千。常駐其地。無事則控扼形勢。可以銷奸宄之萌。有事而提兵應援。可以據水陸之勝。故坐鎮一處。而滇黔川粵俱有磐石之固矣。所謂百年久遠之計。而非徒爲今日一時之謀也。部覆不能行。其後雲貴變亂。數省動搖。論者乃嘆公之先見云。九月奉旨命往薊州鳳臺山。相視世祖皇帝山陵地。公同欽天監諸臣。匹馬往來於荆棘閒。登馬蘭峪。狼兒窩。龍洞峪。涉潏河。夜宿帳房。天大雨雪。坐亂石流水閒。公有絕句以紀之云。舊是長城烽火臺。高峰崩巒倚天開。而今已見真人氣。雲物先從龍洞來。其二云。葉落平原草尙肥。上公獵騎競合圍。晚來分得雙肩兔。一道寒光照短衣。事竣回奏。復同禮部再行詳審之旨。公再至薊州。而山陵已定。

癸卯公四十八歲

二月公循例考滿。上云魏裔介才猷敏練。勞績素著。著加太子太保。賜羊酒。表裏各三疋。吏部尙書缺。九卿科道會推。咸舉公。復補授吏部尙書。公整肅銓政。杜絕夤緣。滿漢同寅。協恭。部政一新。人才疏通。無壅滯者。

甲辰公四十九歲。

纂修拙菴公所修柏鄉縣志。及魏氏家乘。捐貲刻之。孫鍾元徵君人品甚高。著書甚富。屢徵不起。有人誣其譏訕者。公察其誣。爲白其寃。冬武會試。上以大學士衛周祚及公爲大主考。取武進士一百餘人。公有詩云。海宇妖氛已蕩平。聖朝耀德復觀兵。垂綸自有鷹揚佐。緩帶豈專叔子名。輔弼憂勤思國士。省臺諮議守嚴更。應知牝牡驪黃外。索駿空羣百代情。十一月。公補授內祕書院大學士。時詔求直言。左都御史龔鼎孳上疏請赦。公力贊之。赦詔內善政甚多。長星銷而不見。

乙巳公五十歲。

著聖學知統錄。自伏羲以來。至於許魯齋。薛敬軒。皆詳考而論次之。又以格物之解。紛如聚訟。作致知格物解。大意言窮至事物之理。窮至於至善處也。容城孫徵君寄書曰。窮理盡性至命。一以貫之。無錫錢肅潤。甬上陳鴻績。序之時。有江南大儒陸世儀。字桴亭。令其徒四子。沙一卿。周鼎新。郁植。曹禾。來從學。沙一卿讀知統錄。而大有悟。慨然曰。天者。性所從出也。性至善者也。性無不善。其有不善者。氣質耳。此孟子之所謂性。非諸儒所可及也。是錄出而前千百年授受之統。於此而定。後千百年教學之統。亦於此而定矣。

丙午公五十一歲。

公請假省視墳墓。八月出京。縉紳士大夫送於國門之外者。車數百輛。至里。祭告祖考墳墓。焚黃建碑。

捐銀四百兩修文廟。造橋梁。獻對聯於文廟。至聖先師殿云。江漢秋陽。肖聖心之體。嘆意必固我之絕。無。淇然太虛。本性萬年未發。金聲玉振。備至德之全。惟仕止久速之各當。浩乎元氣。斯文千古在茲。

丁未公五十二歲。

春正月。至京。卽入院辦事。有科臣柯簞上疏。請以方孝孺從祀孔子廟廷。大學士班公極言孝孺之誤國。欲公擬旨斥孝孺。公力以爲不可。曰。孝孺。夷齊一流人也。竟不從。七月初七日。皇上親政。頒敕詔於天下。公以從一品廕一子。遂送勳爲廕生。而以勳先得四品官。生子弟裔。侗。篤手足之愛也。上旣親政。天性仁慈。無疾言遽色。公以爲堯舜之資。進退應對。恂恂不失尺寸。上亦重公。凡有所詢問。盡忠以告。所薦舉。皆不告之於人。八月。有旨命公祀至聖先師。九月。命公同家宰杜立德。主考武會試。十一月。冬至。奉世祖章皇帝。配享上帝。皇地祇。並奉冊寶。上聖祖母太皇太后。聖母皇太后。徽號。蒙覃恩。贈公會祖樂吾祖。乾仲父。拙菴。俱爲光祿大夫。太子太保。內祕書院大學士。加一級。曾祖母馮氏。趙氏。祖母張氏。程氏。母張氏。俱贈一品夫人。

戊申公五十三歲。

夏。旱。命內外通行熱審。公有詩紀之。秋。大水。直隸。河北。河南。民田大壞。而山東尤甚。撫院甘文焜查報。公擬旨蠲免。民稍得生。是秋八月。復命公祀至聖先師。

己酉公五十四歲。

修知統續錄。自伯夷柳下惠。以至顧憲成高存之。自序云。天運遞衍。賢哲代興。自董江都以下至高存之。或才力有厚薄。學問有淺深。時命有隆替。師友有淵源。德業不同。要皆篤志進修。挺然自立。不惑異端。潛心希古。豈非所謂豪傑之士。雖無文王猶興者也。其大意如此。時吏部疏言。直隸道府應盡用滿洲官。是日同金公巴泰。在瀛臺啓奏。上詢可不可。公對曰。何爲不可。但各府州縣文皆漢字。未便翻譯。須用兼通滿漢者。乃可耳。上遂止其事不行。

庚戌公五十五歲

上命公同禮部尙書龔鼎孳。吏部侍郎王清。學士田逢吉。主會試考。賜宴。特命滿洲勳臣主席。予表裏花紅。二月初六日入闈。公矢公矢慎。誓之於神。進呈題之後。公卽擬作三篇。卷至晝夜閱視。無一字不經口。有文可頡頏。而難以定去取者。必合前後場比較。以定其去取。又諭諸同考官曰。考試官好取青年門生。故擇文字秀嫩者入選。殊不知積學之士。困苦一生。其文必出經入史。命意高遠。修詞古奧。若不加意搜索。則彼終無出頭之日矣。切不可也。是科文最典雅高古。得人最盛。以宮夢仁爲首榜。如李公諱光地。張公諱鵬翮。郭公諱琇。徐公諱乾學。趙公諱申喬。王公諱拔。李公諱振裕。陸公諱隴其。邵公諱嗣堯。皆榜中士也。江南選文家。如盛珍示。蔡九霞。王惟夏。許燕及等。皆以爲起數十年之衰。如歐陽文忠公之主試。文體一變。云。是年十二月第三子荔彤生。孕時屢有佳兆。其母夢院內有高竿雙燈。公又夢有鶴銜赤實來巢屋樑。

辛亥公五十六歲

春公有疾辭歸。或曰：公年尚壯，何遽萌是念？公曰：仕宦豈有定期哉？昔唐李日知爲刑部尚書，屢乞骸骨，許之，將請不謀於家，歸乃治行。明章楓山四十一歲，便乞致仕，知止不辱，知足不殆，古人之所尚也。吾病旣深，何可久居私寓，以誤國事？遂上疏陳疾力辭，上以公輔弼久，不欲遂公請，乃溫旨褒嘉，曰：卿才品優張，簡任機務，正資贊理，覽奏患病，情詞懇切，准辭任回籍調理，病痊起用。公旣得予告之旨，又調理二月，遂出國門，襜帷蕭然，從者數人，別無行李。一時縉紳餞送者數百人，詩章多有可述。至里，冀而刻之名曰青門集，是冬公閱宋人陸務觀詩集八十五卷，仍選定令人抄成一集，蓋務觀詩識見超踔，風味雋永，與衆迥然不同。故公晚而好之，是冬爲兒嘉孚行納徵禮於梁少宰，臘月爲嘉孚娶於梁氏。

壬子公五十七歲

公在真定，督子姪總勸男等入雁景園閉戶課文，公喜而咏之云：罷相歸來問芰荷，荒園老屋映庭柯。文章應許如班馬，詩賦還應擬李何。偶向高齋尋寂樂，時烹香茗對藤蘿。春來桃李爭先發，喜見烏衣磊落多。春世祖章皇帝實錄告成，上諭吏部皇考實錄告成，克昭一代之典章，永垂萬世之模範，監修總裁等官著有勤勞，宜加寵錫，加公爲太子太傅，公具疏控辭，奉旨世祖章皇帝實錄告成，關係大典，卿董率纂修，著有勞績，所加官銜已有諭旨，著祇遵成命，不必控辭。是夏居柏鄉，輯孝經註義，纂集格

言曰瓊琚佩語。詞林孫屺瞻曰。註義補先儒所未逮。爲後學之津梁。六經奧義。首在於茲。有裨聖學。非淺鮮也。瓊琚佩語一編。格言正訓。惟是力行未能。時時撫躬滋咎耳。屺瞻者。名在豐。亦庚戌科所取士也。公又命屺瞻書鑑湖堂扁。取唐人賀知章鏡湖一曲之義。懸之於肯逸園。園在城東南。趙氏之菜圃也。售之於公。草堂三間。舊亭一座。黃山數尺而已。公咏子美詩云。水深魚極樂。林密鳥知歸。湖中有小舟。每與友人徜徉。蒹葭白露之間。與鷗鷺爲鄰。作南湖釣艇賦。秋八月上。又欽賜公雲緞七表裏。青馬一匹。鍔金鞍轡一副。白金一百兩。公具疏謝。又奉溫旨焉。是科順天鄉試。姪鏗中式。未幾公弟辨若病故。公哭之慟。有詩云。垂髫曾共頌奇書。自許才華世不如。蹭蹬中年始發迹。迺遭一令便懸車。治留棠蔭稱遺愛。詩積青箱是蠹魚。此後五人中少爾。臨風灑淚滿衣裾。又諸昆濟濟樂笙簧。九月猶同宴一堂。叢菊花殘陶令死。青山酒渴謫僊亡。柳莊作賦空驢背。午水臨流罷野航。寄語姪曹須珍重。生平著作謹收藏。蓋公之篤於手足如此。又有思故友楊方伯詩云。老來無友爾堪傷。閱盡朝華與夕陽。會許且亭續子美。誰知河內損嵇康。孤城畫角樓空倚。紫塞征鴻背有霜。聊與鄉人忘爾我。風流今識展禽狂。

癸丑公五十八歲。

春日公常攜友人遊張村園亭。是歲孫北海寄一聯云。文中子門多將相。郭令公身係安危。又一聯云。司馬有時稱獨樂。希文無地不先憂。蓋以溫公文正許公也。

甲寅公五十九歲

值三逆之變。征南大兵過槐水。有滿漢中書舍人來謁公。詢以方略。有江南人余讜對曰。進言者云。賊鋒正銳。宜於守。公曰。是也。能守而後能戰耳。是年夏。大行皇后崩。部文奉旨停止哭臨。不成服。公上恭慰聖懷疏。

乙卯公六十歲

時公叔麗榆。正任潮州太守。不肯從賊。爲賊所羈。是年公以歷代古文無善本。選定本題曰欣賞集。自左國迄元明。皆有序文。冠其卷首。而其總敍云。歷代古文者。天地之符瑞。人生之菁華也。自伏羲畫卦。倉頡作字。而大文啓矣。易曰。觀乎天文。以察時變。觀乎人文。以化成天下。於是乎易以象之。書以記之。禮以秩之。詩以咏之。春秋以正之。然後天下萬事萬物之理備焉。故五經者。萬世文章之祖。而夫子刪詩書。定禮樂。功高堯舜。以此已聖。遠言湮。左邱明親炙耿光。猶未盡得聖人之意。戰國秦季。其言雜亂。兩漢稍稍復古。賈誼董仲舒。司馬遷班固。其最也。六朝綺靡日甚。唐宋之間。有歐陽二三君子。起其衰。而振其弊。蓋必得經之意。以爲文。而後其文足以傳。此文之所以與立德立功而並垂爲三不朽也。故選本雖多。精確者少。梁昭明太子文選。雖稱奇書。而專務詞華。真西山先生文章正宗。趨向正矣。而文體割裂。若近日之名世文宗。古文奇賞。古文必讀等。或略而不備。或駁而不純。批評之語。腐穢荒謬。訛以傳訛。俾後生小子。失所依歸。而反以鋼塞其聰明。迷惑其心志。非所以端教化而訓蒙士也。余里居

無事。乃取幼所誦習古文。推而廣之。摭摭搜輯。考證於左國全本。及廿一史各家文集。而爲茲選。自乙卯之夏。四月至秋九月。克竣厥事。一心一手。不假他人。蓋不遺餘力矣。舊批佳者存之。訛僞者盡行芟削。另出己意。其文隨時代爲序次。不分門類。各體具備。在人自得之耳。雖非轡龍繡虎之彩。已盡縹囊細帙之奧。質而有文。庶幾乎彬彬郁郁者也。集成名曰欣賞。蓋有取於陶淵明奇文共欣賞。疑義相與析之義焉。學者倘因文以見道。由古文以進於五經。卽聖人之意可得而求也。

丙辰公六十一歲

春爲子荔彤。延趙州張元裕爲師。回卽公自教之。是歲刻鑑語經世編。鑑語者。閱司馬溫公資治通鑑而撮其要者。公自甲辰以後。卽閱通鑑全書。常苦其浩繁難記。因摘其要者。抄錄成帙。初名鑑語。防左邱明國語之意也。宛平孫北海先生曰。是書足以經世。因易此名。辛亥歸里。覆閱。壬子又閱一週。再加增益。每段之下。詳略不等。識其所見而論斷之。前後有十年之力。至是始付剞劂。其後二年始告竣。孫北海謂自左馬以後。世鮮史材。茲書本末具備。采取精要。評議確正。經濟文章。兼總無遺。申臆盟謂其體裁同於左國。識議過於廬陵。天地閒一奇書也。魏離伯謂其嚴正直。直追朱紫陽。豈但爲涑水之功臣乎。一時遠近學士大夫。爭欲得之。是年會試公姪總中式。

丁巳公六十二歲

是歲公次子嘉孚歲貢。田閒無事。取金壇蔣楚珍先生四書舌存刪定之。令人抄錄成書。名曰四書惺

心編未能刻也。著有樗林偶筆。上下二卷。上卷多言性理。下卷多言世務。樗林者。公所居之東菜園也。多樗樹故名。是年因爲公子嘉孚選易課。自作易文二十餘篇。輯先賢卜子夏集成。又節抄家語而刻之。八月公孫世晉生。

戊午公六十三歲。

是春上命在廷諸臣及各巡撫。舉薦博學宏詞之臣。有陝西道御史焦榮。以公應詔。疏內稱公履籍翰苑。品行夙著。淹貫經史之學。兼富著作之材。學行兼優。韓富文范之儔等語。然公素不識其人也。總憲魏環溪曰。邇來第一篇大文字也。魏環溪自丙戌通籍以來。與公志同道合。三十餘年矣。未嘗不以學問相切磋也。太夫人墓誌。環溪倩公爲之。嘗欲自至柏鄉。又欲其令嗣學誠來。公皆止之。惟有老友潘藏山往來耳。夏著樗林續筆。輯瓊琚佩語。佳言玉屑等書。又批四書存疑。著四書捷講。以訓蒙。公少子荔彤。延師李躋如教之。是年爲荔彤結姻於保定于氏。乃公丙戌同年少司寇于岱仙也。九月隆平縣大水。知縣不肯報災。公力勸之。申請撫院題疏。得免十分之三。

己未公六十四歲。

春公爲少子荔彤。選引蒙課文及墨卷。親爲講解通鑑。古文必讀等書。是年二月內會試題至。公作擬程三篇。舊大名道孔心一僑居臨清。作詩云。己未科春榜未發。柏鄉相國寄示擬程三章賦酬。其一云。沙隄久不聽鳴珂。麟閣功名寓薜蘿。高臥方知天趣遠。崇班轉覺世緣多。淡懷時共雞窗話。妙墨新傳

象鼎歌。漆硯濤鳴千頃勢。化爲飛雨長菁莪。其二云。愁見人文八變風。多將素質綴青紅。衣如楚相終歸謫。貌似中郎卻未工。誰陟危峯窺日月。驚觀彩筆闢鴻濛。名經出自調元手。雲霧齊消見碧空。其三云。經義掄才令典垂。每隨世運轉平奇。文思落紙誰能主。風氣移人自不知。白鹿一燈傳慧業。青雲多士景威儀。東山正好耽絲竹。養字晨窗尙惜時。其四云。山中宰相負書淫。五典三墳一往深。黃閣絲綸襄雅化。平泉花鳥寄幽襟。宦情蚤避爭名地。儒術難忘垂教心。紙貴洛陽欣再見。雄文依舊購雞林。四月長子勤以廕選補刑部四川司員外。時有戶部二缺。或言其利者。公正色斥之曰。少年未更事務。受朝廷恩典。正好練習刑名。廣行仁恕。何以利爲。作家書以此諭之。隆平縣漳河口決。淹沒民田數十村。公告其縣尉修之。仍作詩勸勉。不一月而隄告竣。數十村之民始得佈種。秋禾不至逃竄也。夏六月纂補易經大全成。十月嫁第三女於高邑李氏。壻名李雲麗。故明相國李文節公之裔孫。孝廉李僕之第四子也。十二月上賜日講四書解義。公具疏謝。內云。修身爲本。列大學之首章。允執其中。冠魯論之末簡。中庸言天德。而歷敍九經三重。孟子陳王道。而亟稱發政施仁。義蘊宏深。體之有要。人君爲學。原不同於儒生之尋章摘句也。又云。今者用人行政。次第舉行。小醜漸次削平。尤深根本之慮。貪污雖已。察處更嚴。徇縱之條。足兵餉而仍不病乎民生。阜財用而仍勿傷乎國體。崇節儉。獎清廉。則羣工自勵。恤災荒。均賦役。則百姓自安。云云。上嘉納之。

庚申公六十五歲。

客有詢公以何樂者。答詩云。偶爾三槐座。今宜二仲延。那知真樂地。不在貴乘軒。詞賦驚前輩。功名讓後賢。庭前花燦發。許我醉如顛。是月公次子西行。省公弟於平遙。公長子勤陞刑部貴州司郎中。五月公少子荔彤出痘。百日限足始入學。爲之選古文墨卷詩文。俾肄習。而每日塾師所授書。必親爲之講解。公所著希聖錄。十餘年。至是始成。其書有五。一曰爲學門。二曰格致。三曰存省。四曰謹慎。五曰遷改。六曰關距。七曰惇倫。八曰君臣。九曰父子。十曰夫婦。十一曰兄弟。十二曰朋友。十三曰致治。十四曰宰輔。十五曰臺諫。十六曰牧守。十七曰教化。十八曰武備。十九曰教家。二十曰勤儉。二十一曰學問。二十二曰敦睦。二十三曰仕宦。二十四曰祭葬。二十五曰涉世。二十六曰頤養。二十七曰度量。二十八曰謙忍。二十九曰義命。三十曰應接。蓋致知格物。正心誠意。修身齊家。治國平天下。俱蘊括其中矣。是歲刻女誠女孝經。女論語成。其女論語。則卽舊本而刪定之也。女誠女孝經。如舊。

辛酉公六十六歲

正月十八日。公少子荔彤應督學吳公科試。取中入學第七名。十二月公長子刑部貴州司郎中勤。代領上欽賜日講尙書解義到第。公謹設香案。望闕叩頭。祇受訖。具本恭謝。疏云。竊念臣才識迂疏。學問淺薄。不過粗通章句而已。若尙書二帝三王之大道。敬天勤民之極則。何能窺測一二。蒙皇上不忘故舊。念及犬馬。曾賜日講四書解義一部。發四子之心傳。繼千聖之統緒。臣朝夕講解。愚蒙之心。日以開豁。茲又蒙御賜日講尙書解義。臣展卷跪誦。大義昭然。虞夏商周四代之心法。治法燦然。紙上皇上。括之以敬誠中。而危微精一之旨。平章協和之化。媿堯舜而軼湯武者。其志勤道遠。具見於御製一序中。

矣。臣雖踈伏草野，讀皇上所賜之書，如侍宸扆之側，繹皇上所製之序，如聆咨儆之音，臣何幸邀此曠典，受此隆恩，得聞所未聞，以不虛此生也。行見聖子神孫，奉以爲保邦致治之寶鑑，官紳士庶，守以爲亮工熙績之洪謨，社稷享無疆之休，歷服緜維新之慶矣。二月內，皇后梓宮發行，是時在京諸公，多有勸公北上送葬者，公以己係告病之官，具疏陳明，非敢求安逸也。蓋大臣之義如此。四月內，公少子荔彤歲貢入國雍，塾師李躋如丁母憂，公仍自課督之。七月，值公懸弧之辰，公長子郎中勳，以長安公卿大夫贈詩，裝屏寄至里。大學士高陽李坦園先生爲之序，辭曰：今上御極之二十年也。七月二十五日，是爲柏鄉閣老貞菴魏公懸弧之辰。先是歲在乙卯，公屆六袞大慶時，值奸萌竊發，聖天子奮揚神武，掃除遺孽，所在用兵，烽燧相望，靡有甯息。四方來致賀者，公概峻卻之，弗與通。方今閩粵、江、楚、滇、黔、巴、蜀諸地，救甯底定，海宇清晏，正生和樂，公長君比部郎勳，暨門下士之仕於朝者，謀所以爲公壽，而乞言於子，子與公隸畿輔屬邑涿郡，於鄙城爲齒錯壤，則里居同，丙戌試南宮，竊附公蘭譜之末，則通籍同膺世祖章皇帝殊恩，擢置史館，洊歷晉秩，皇上眷注恩渥，供職綸扉，歷事有年，靡弗朝夕與俱，則受兩朝之寵遇，同予知公最深，親炙公亦最久，其何敢辭。予嘗讀歐陽修上范司諫書，謂宰相行其道，諫官行其言，宰相諫官，繫天下之事，任天下之責，諫官雖卑，與宰相等，然自漢唐以來，相業之盛，蕭曹房杜而下，惟宋仁英兩朝爲最著。其時如韓魏公琦、范文正公仲淹、富鄭公弼、杜祁公衍、歐陽文忠公修、文潞公彥博，相繼登朝，照耀史冊間，要其以諫官而登宰相者，歐陽文忠一人而已。今屈指公在仕版。

由中祕居諫垣者十年。爲御史大夫者十年。由冢宰卽入秉政府者七年。三十年中。不爲諫官。卽爲宰相。以一人之身。兼歷二者之任。而獨專且久。以展其嘉謨碩畫。變理參贊之猷。歐陽以後。惟公一人而已。公自給諫。以至司憲。剛正審諤。知無不言。以肅班聯也。則有請舉視朝之疏。以端士習也。則有孝經取士之疏。以恤民依也。則有拯救流亡。停止加派之疏。以裕國計也。則有縱核錢糧。敬陳理財之疏。以飭武備也。則有軍政事宜。敬陳用兵大勢之疏。以表忠烈也。則有褒錄幽忠殉難。事同一例之疏。至若條議八策。敷陳五困。於生民之利害。社稷之大計。剴切敷奏。殆與魏文貞之十思十漸相上下者。上於是有才猷敏鍊之旨。畀公以銓衡重任。不踰年而特簡中台矣。公勤贊廟謨。平章國事。爲朝廷計苞桑。爲閭閻軫疾苦。往往有人所不及知。不及見者。每於退食之暇。自經史子集。濂洛關閩。百家衆說。陰陽兵律。山經地志之書。無不肆力研究。以佐經邦論道之資。皇上方倚公爲股肱心膂。不可一日離左右。而公屢疏乞休。情詞懇摯。特奉恩綸。予告歸里。一時公卿大夫。設供帳祖道都門外。京師之能詩者。率爲咏歌以張大其事。比之漢疏。廣受尤爲過之。公之遭遇榮矣哉。歸則杜門掃軌。窮幽探蹟。凡所著述。如知統論。性約言讀。書希賢諸錄。以及經世惺心。諸編清覽。溯洄欣賞。兼濟堂諸集。汗牛充棟。直與身等。若公者。出則爲國家之碩輔。處則爲作述之大儒。業藏名山。而功垂竹帛。可謂今古之偉人已。歐陽集中所載書疏劄子。動輒數千言。拳拳忠悃。其他著作。類皆原本六藝。爲有宋一代文章之冠。試以公頡頏其間。幾幾乎鳧列而鴈次者。若其尋墜闡微。旁搜遠紹。毅然以斯道自任。恐文忠公亦未之及也。

昔富鄭公以致政家居。文潞公以太尉留守西都。與王中丞拱辰、席司封汝言、司馬文正公光等共十
三人爲耆英會。圖畫其像以爲美。是時文正公年最少。亦已六十餘矣。予雖不敢以文正自況。然視公
固兄事者也。異日者。邀聖天子光天化日之恩。優游林壑。從公于鹿牀石几。川雲嶺月之間。亦如香山
洛社故事。講德談道。歌咏太平。更欲乞公以熊經鳥伸之術。逍遙物外。以頤養天年。公其能許我否耶。
遂不辭而爲之序。是秋有閒吟七言絕句云。參禪煉氣皆多事。只是還他一太虛。晏坐不知秋欲老。星
移斗轉月明初。又云。穩臥鄙南月掛村。困無積蓄篋無銀。五經珍襲時披誦。此寶真堪遺子孫。又云。心
卽性兮性卽神。此真之外更無真。若云無惡並無善。一點良知更何因。王陽明云無善無惡良知非善而何又云。天道原
來是自然。渾淪四七度周天。五星日月皆東轉。如此光陰成歲年。冬請庠生張靖臣爲荔彤講易經。十
月永年工部尙書冀公諱如錫。及公壻冀棟來與公次女行納徵親迎禮。

壬戌公六十七歲。

四月張西山先生、自山左差人來求文集序。公作而寄之。西山者京師人。橫渠張子之後。著作甚富。得
濂洛關閩之傳。與公契。故爲序之。公長子勤陞江西建昌府知府。八月又筆削希聖錄。九月爲荔彤娶
婦於保定于氏。

癸亥公六十八歲。

正月公爲少子荔彤講孝經。點四書集註。張闕老直解。閱韓選墨卷。訂正魏氏世德家傳錄。及衡山公。

樂吾公、乾仲公、拙菴公、文集未刻者皆刻之。補刻嶼舫近草、秋點定諸理齋通鑑纂要、閱朱文公集完。十月送柏鄉知縣邵公嗣堯歸里。邵庚戌之役，公所拔士也。以清直故不合於時。嘗題贊公小像云：可舒則舒，可卷則卷。既直而剛，不爲儒輒。正色立朝，百僚斯勉。膏澤及民，匪躬蹇蹇。黃閣宣猷，閉邪陳善。我后之德，躋於二典。有言嘒嘒，虛公以辨。勇退急流，需沙以衍。左圖右書，鴻文日演。經飽其腹，史取其櫛。文富范韓，薦草輝輝。夫豈譽私，公論不舛。公像儼然，公心如洗。願學魯鄒，詖淫是遣。古聖之蘊，公開其鍵。是冬批評易經存疑完。

甲子公六十九歲

正月公兄鹽運使竟甫公病故。公哭之慟。未幾南宮杜子靜之訃至。杜諱鎮，公之友也。公之友無幾。孫徵君、孫北海、魏環溪、申冕盟、楊猶龍、魏蓮陸、郝雪海。至是而零落殆盡矣。公作詩輓之。六月，上諭開列原籍德望大臣起用。部臣首以公名入。爲某所阻，不果行。秋七月十九日，蔡恭人卒。公次子嘉孚生母也。冬，公爲少子荔彤選定時藝。仍朝夕講論。常至子夜不倦。偶病，自書遺疏稿，付荔彤收藏。云後日即以此疏封齋。其生死了然如此。

乙丑公七十歲

春正月，公四女出適真定梁氏。婿名允莊，蒼巖相國之胞弟子也。二月，公姪男中進士。五月，選庶吉士。上臨軒親點唱名及公姪。上垂問公起居甚詳。因問宛平相國曰：此人是其胞姪乎？對曰：乃其胞弟溫。

州同知裔愨之子也。遂蒙恩選入中祕焉。其年上賜易經日講解義。公具疏謝。夏公偶行蹶傷齒。復傷暑熱。齒齟甚劇。延醫治之。痊愈。然精神稍減。往昔矣。七月。長子勤以慈母例。自建昌奔蔡。蔡人喪歸。攜江西巡撫安公世鼎。並諸司道祝壽屏至。長安門生徐公乾學。孫公在豐。嚴公我斯。李公振裕。王公揆等。亦製屏祝公七袞壽。王宛平。宋長洲。梁真定。吳漢陽。徐崑山。李合肥。陳澤州。諸相國。杜秀水。董平原。諸公。俱有詩遙祝。備極一時之盛。公皆以楮翰答謝。是冬常在內室靜處。屏絕外事。語人口。人生七十古來稀。況已位叨台閣。逍遙林下。著書自娛。尙何分外之求哉。

丙寅公七十一歲。

元旦自書一聯云。烏頭宰相。歸林下十有六年。常思乾乾翼翼。白髮書生。慶青春七十一載。甯忘戰戰兢兢。蓋公天心澄澈。生死勘破。故自書曾子臨終之言於柱。以驗其學力到處。惜乎人未之覺也。初二日。賀公嬪母周恭人節。公七叔潮州太守諱槐祥元配也。備絃古來賢臣年壽之期。云率皆不過七十。蓋亦自況之意耳。人日果病吐血。昏眩移刻。方蘇。公平日精神健旺。以七旬之年。耳目未少蔽暗。燈下讀書。常至夜分。爲子弟儒生講解書義。或批闌藝文。奮筆疾書。日下十行。少年人所不及。因齒齟之後。庸醫誤投苦寒之劑。致敗血停滯於內。初八日復昏眩少刻。醫家仍認爲痰火。投以梨藕之汁。病愈深矣。二月公病少痊。然神氣不能平復。病中猶常呼子弟至榻前。朗誦諸書。以自娛樂。其天性好學。至老不倦也。四月初五日公病大作。至初九日丑時。正襟危坐而逝。遺命刻楊公猶龍弔武侯詩於墓石。其

詩云定軍山下路。丞相有孤墳。故國空流水。荒阡足暮雲。君才自十倍。天意竟三分。行客年年過。鶯啼不可聞。蓋念武侯王佐奇才。下視管樂。且佩其鞠躬盡瘁之言。而以之自命也。長子勤等卽繕錄公前爲遺疏入告。繼而撫臣于成龍。復有閣臣病故一疏。奉旨給與應得卹典禮。臣復疏准與祭葬。先是公立朝時。曾無意中開罪於某。及公病危。疏入。上問及公品行。某以非言加之。並欲奪公卹典。賴學士徐公乾學力爭。得旨依禮臣議。而議諡之典。竟阻撓留中矣。於丁卯之二月十二日。欽差井陘署道周濂祭於里第。於己巳之四月初三日。葬公於城南路村。卽聖德村之新阡。徐公乾學誌其墓。銘曰。從盈必大。始賞天啓。參國趙魏。蕃昌施祉。高平鄭國。頻復其始。縣延蘊崇。篤生夫子。翊我興運。官用儒起。道宏言傳。匡輔燮理。移病致仕。弗俟年齒。星終踰四。徜徉閭里。急流勇退。自贊云爾。稽古典學。著厥統紀。壽考彌性。隕予仰止。赤志商封。銘藏奚委。宅兆食墨。國安歸體。利其後人。綏福百祀。冢宰張公。士甄冢額。相國李公。天馥書丹。先卒之韓。袁傅蔡諸夫人。並會葬焉。題墓表者。狀元少宗伯嚴公。我斯也。葬後二年辛未。鄉里紳衿士庶。公舉公德行學問事業經濟。堪爲配食聖廟。蒙撫臣郭公世隆批云。原任大學士魏公德業文章。本部院夙旣佩服。准卽置主。擇吉入祠。復蒙學臣顧公藻批曰。看得已故大學士兼禮部尙書魏公諱裔介。河嶽鍾靈。珪璋協德。早歸齷禁。學貫天人。晚置鳳池。功多啓沃。當廷陳奏。不異崇政說書。援筆成文。兼似午橋相國。帝方資乎補袞。人盡仰其懸車。綠野平泉。杜門卻掃。關銘洛傳。殫思窮神。允爲理學醇儒。豈特邦家元老。乃賜祭賜葬。已邀殊恩於九天。加豆加籩。未永明禋於千禩。宜

從公請崇祀二丁。遂於是年八月初一日迎主入祠。致祭訖。經事者守道邵公嗣堯。巡道許公兆麟。署井陘道。眞定府知府馬公世恩。趙州知州龔嶸。柏鄉知縣陸賓也。各有批詞。載鄉賢錄中。是冬奉旨修三朝國史。徵取公所著書。遂將公詩文奏疏存稿。並咨送部院。載入國史。永垂不朽云。